

An Chomhairle um Oideachas
Gaeltachta & Gaelscolaíochta



Comórtas oscailte do Bhainisteoir Tionscadail chun
ceannaireacht a ghlacadh ar an togra **An Tobar**

Togra nua is ea **An Tobar** chun acmhainní agus sraith
straitéisí a chruthú do mhúineadh na Gaeilge i
Scoileanna Meán-Bhéarla (scoileanna T2)

Leabhrán Eolais

Márta 2025

Bainisteoir Tionscadail sa Chomhairle um Oideachas Gaeltachta agus Gaelscolaíochta (COGG)

1. An ceapachán

Bunaíodh an Chomhairle um Oideachas Gaeltachta agus Gaelscolaíochta (COGG) faoi fhorálacha Alt 31 den Acht Oideachais 1998 le comhairle a chur ar an Aire Oideachais agus ar an gComhairle Náisiúnta Curaclaim agus Measúnachta maidir le teagasc trí Ghaeilge sna bunscoileanna agus sna hiar-bhunscoileanna Gaeltachta agus lán-Ghaeilge agus maidir le teagasc na Gaeilge i scoileanna uile na tíre, chomh maith le soláthar áiseanna teagaisc a chomhordú, seirbhísí taca a chur ar fáil agus taighde a sheoladh.

Is mian le COGG Bainisteoir Tionscadail a cheapadh chun ceannaireacht a ghlacadh ar an togra **An Tobar** chun tacú le múineadh na Gaeilge i mbunscoileanna agus in iar-bhunscoileanna T2.

D'fhéadfadh, ach ní gá, gur ar bhonn iasachta a dhéanfar an ceapachán. Conradh dhá bhliain ar théarma seasta a bheidh i gceist.

2. Dualgais an phoist

Freagrachtaí an Bhainisteora Tionscadail:

- Beidh sé/sí freagrach do Phríomhfheidhmeannach agus do Leas-Phríomhfheidhmeannach COGG.
- Tacóidh sé/ sí le cur chun cinn fhorbairtí / thograí na Roinne Oideachais reatha agus sa todhchaí i réimse mhúineadh na Gaeilge i scoileanna T2.
- Déanfaidh sé/ sí bainistiú ar fhorbairt an togra nua **An Tobar**, chun tacú le múineadh na Gaeilge i scoileanna T2.
- Beidh an Bainisteoir Tionscadail i gceannas ar fhoireann oifigigh oideachais agus iad i mbun Tobar Acmhainne agus Sraith Straitéisí a chruthú chun tacú le múineadh na Gaeilge i scoileanna T2.
- Beidh an Bainisteoir Tionscadail, i gcomhar le bainistíocht shinsearach COGG, freagrach as pleanáil, riaradh agus bainistiú an togra ó thús deireadh.
- Cinnteoidh sé/sí go mbeidh luas agus leanúnachas éifeachtach struchtúrtha ag baint leis an togra.

- Déanfaidh sé/ sí bainistiú cúramach ar chur i bhfeidhm na spriocanna forbartha agus ama a bhainfidh leis an togra.
- Beidh sé/ sí freagrach as rianú cuimsitheach ar ghníomhartha forbartha a bhainfidh le forbairt acmhainní éagsúla a bheidh mar chuid den **Tobar**.
- Déanfaidh sé/sí tuairisciú rialta i scríbhinn agus ó bhéal do bhainistíocht COGG agus d'oifigigh na Roinne Oideachais san Aonad Gaeilge um Scoileanna Meán-Bhéarla (AGSMB) ar dhul cinn an togra.
- Déanfaidh sé/ sí bainistiú ar aon rioscaí a d'fhéadfadh a bheith i gceist leis an togra agus déanfaidh sé/sí tuairisciú rialta do bhainistíocht shinsearach COGG ina leith, d'fhéadfadh sé go mbainfeadh na rioscaí seo leis na nithe seo a leanas: sceidealú, costas, dearbhú cáilíochta, slandáil teicneolaíochta agus spriocdhátaí.
- Beidh sé/ sí freagrach as bainistiú cairéiseach agus éifeachtach an bhuiséid a bhainfidh leis an togra seo ag cinntiú luach ar airgead.
- Cabhróidh sé/ sí le feachtais feasachta agus poiblíochta maidir leis **An Tobar**.
- Bunóidh sé/ sí comhpháirtíochtaí agus forbróidh sé/sí iad le páirtithe leasmhara eile atá ag plé le múineadh na Gaeilge i scoileanna T2.
- Déanfaidh sé/sí comhfhreagras leis an bpobal, freastalóidh sé/sí ar chruinnithe agus ar chomhdháileacha agus ar ghnáthchúraim riaracháin eile.
- Comhoibreoidh sé/sí le foireann uile COGG le haidhmeanna agus spriocanna na heagraíochta a bhaint amach agus beidh sé/sí freagrach as aon chúraimí eile a thagann chun cinn le linn an tógra agus a iarrtar a c(h)uid cabhrach leo.

3. Riachtanais

- Céim tríú Leibhéal ag leibhéal máistreacht a réimse éigin oibre atá gaolmhar leis an togra
- Fianaise go bhfuil taithí aige/ aici ar bhainistiú agus ar chur i gcrích tionscadail
- Eolas cuimsitheach ar chóras oideachais na hÉireann, agus ar theagasc na Gaeilge
- Ardchaighdeán i labhairt agus i scríobh na Gaeilge
- Sárscoilleana bainistíochta tionscadail, bainistíochta buiséid, airgeadais agus ama
- Sárscoilleana cumarsáide, cur i láthair, agus idirphearsanta
- Sárscoilleana eagrúcháin, bainistíochta agus comhoibrithe
- Paisean láidir soiléir don Ghaeilge
- Sárscoilleana sa teicneolaíocht dhigiteach
- Cáilíocht TEG, Leibhéal B2 nó níos airde
- Cumas le dul i ngleic le haipéanna MS Office 365.

4. Luach Saothair

Seo a leanas na scálaí tuarastail:

Ranníocaíocht Pinsin Neamhphearsanta

Scála 1

€60,161.00	€63,989.00	€66,709.00	€69,550.00	€72,377.00	€75,177.00	€78,703.00
1	2	3	4	5	6	7
€82,840.00	€87,740.00	€92,708.00	€96,744.00	€99,872.00	€102,992.00	
8	9	10	11NMAX	LSI1	LSI2	

Scála 2

€63,223.00	€67,247.00	€70,113.00	€73,094.00	€76,071.00	€79,016.00	€81,494.00	
1	2	3	4	5	6	7	
€87,205.00	€92,358.00	€97,592.00	€101,841.00	€105,122.00	€108,412.00		
8	9	10	11NMAX	LSI1	LSI2		

Maidir le hiontrálacha nua chuig an tseirbhís phoiblí, ceanglaíonn beartas an Rialtais orainn gach post a líonadh ag an gcéad phointe den scála. Ach duine ar bith a cheapfar ar iasacht ón earráil oideachais agus a bhfuil tuarastal níos airde aige/aici ná an chéad phointe de scála na nOifigeach Oideachais d'fhéadfaí é/í a chur ag pointe iomchuí ar an scála cuí. Tabhair faoi deara go bhfuil liúntais agus a gcur chun feidhme faoi réir athbhreithniú leanúnach ag an Roinn Caiteachais Phoiblí agus Athchóirithe agus go bhféadfaí iad a athrú. Lena chois sin, d'fhéadfaí an ráta luach saothair a athrú ó am go chéile ar aon dul le beartas pá an Rialtais agus tá an tuarastal faoi réir gach asbhaint reachtúil, lena n-áirítear Asbhaintí a Bhaineann le Pinsean.

5. Saoire bhliantúil

30 lá oibre a bheidh sa liúntas saoire bhliantúil, *pro rata* d'fhad an chonartha. Liúntas é sin a bheidh faoi réir na ngnáthchoinníollacha maidir le deonú saoire bhliantúil agus atá bunaithe ar sheachtain oibre cúig lá. Ní áireofar air na gnáthlaethanta saoire phoiblí.

6. Suíomh

Tá príomhoifig ag COGG ag 23 Plás Windsor, Baile Átha Cliath 2. **Beidh an té a cheapfar lonnaithe sa phríomhoifig** ach tá polasaí cianoibre i bhfeidhm ag COGG.

7. Comhdheiseanna

Eagraíocht chomhdheiseanna is ea COGG agus cuirtear fáilte roimh iarratas ó dhaoine faoi mhíchumas.

8. Eagar an chomórtais

- Tá an ceart ag COGG iarratasóirí a ghearrliostú.
- Déanfar seo de réir chomhlíonadh na riachtanas thuasluaite.
- Seolfar ríomhphost le sonraí agallaimh chuig na hiarratasóirí ar an ngearrliosta.
- Beidh na hagallaimh ar siúl i mBaile Átha Cliath nó in ionad eile in Éirinn ag brath ar shocruithe réasúnta don bhord agallaimh.
- Déanfar freastal réasúnta ar riachtanais ar leith a bheadh ag iarratasóirí agus iad ag freastal ar an agallamh ach caithfear na riachtanais sin a chur in iúl do COGG ar a laghad seachtain roimh an agallamh ionas gur féidir socruithe cuí a dhéanamh.

Ar bhonn **agallamh iomaíoch** a dhéanfar an roghnú agus iarrfar ar iarratasóirí cur i láthair (10 nóiméad) a ullmhú roimh ré, agus a thabhairt ar lá an agallaimh. Beidh an t-agallamh bunaithe ar na hinniúlachtaí a bheidh riachtanach chun dualgais agus freagrachtaí an phoist a chomhlíonadh, faoi mar atá leagtha amach sna liostaí riachtanas don phost mar a luaitear thuas:

Roimh an bpríomhagallamh, beidh triail scríofa Ghaeilge ag leibhéal B2 Gradam den Fhráma Tagartha Eorpach le déanamh ag iarratasóirí (Féach www.teg.ie)

9. Iarratais

Beidh ar iarratasóirí litir iarratais ag léiriú mar a chomhlíonann siad riachtanais an phoist agus CV (le hainmneacha agus sonraí teagmhála beirt mholtóirí, uimhreacha gutháin san áireamh) a chur ar fáil.

Cuir seoladh ríomhphoist agus uimhir ghutháin póca ar fáil leis an iarratas.

An tAcht um Chosaint Sonraí 1988/2003

Nuair a fhaightear d'iarratas, cruthaítear taifead i d'ainm le pé eolas pearsanta a chuireann tú ar fáil. Is don phróiseas earcaíochta amháin a úsáidfeá an t-eolas sin. Is faoi réir fhorálacha na nAchtanna um Chosaint Sonraí 1988 agus 2003 a dhéanfar seo. Tá de cheart agat faoi fhorálacha na nAchtanna sin aon eolas a bhaineann leat a fháil ag am ar bith. Trí iarratas a dhéanamh tá cead á thabhairt agat dúinn do shonraí pearsanta a phróiseáil, fiú más íogair iad. Scríosfar do shonraí pearsanta tar éis tréimhse 12 mhí.

10. An dáta druidte

Caithfidh an litir iarratais agus an CV a bheith faighte ag poist@cogg.ie ag tráth nach moille ná **5.00 i.n., Dé Luain, 31 Márta 2025.**

Admhófar gach iarratas agus sa chás nach bhfaightear admháil laistigh de 5 lá, is ceart é sin a chur in iúl d'oifig COGG. Is ceart athrú ar sheoladh poist agus/nó ar sheoladh ríomhphoist a chur in iúl láithreach.

11. Cáilitheacht

Níl cead ag iarratasóirí cur isteach ar an gcomórtas seo má bhain siad tairbhe as na scéimeanna scoir seirbhís phoiblí leagtha amach thíos.

An Scéim Luathscoir Dreasaíthe (SLSD)

Coinníoll is ea é den Scéim Luathscoir Dreasaíthe, mar atá leagtha amach in Imlitir 12/09 na Roinne Airgeadais, toirmeasc a bheith ar lucht scoir, faoin scéim sin, iarratas a dhéanamh ar phost eile san fhostaíocht nó san earnáil chéanna. Mar sin, níl cead ag lucht scoir iarratas a dhéanamh ar an bpost seo.

Imlitir na Roinne Oideachais agus Scileanna 7/2010

Is le Imlitir 7/2010 na Roinne Sláinte agus Leanaí a tugadh isteach Spriocscéimeanna le haghaidh Luathscor Deonach (VER) agus Iomarcaíocht Dheonach (VRS). Coinníoll is ea é den scéim VER nach mbeidh daoine a bhaineann leas as an scéim cáilithe lena n-athfhostú in earnáil na sláinte poiblí ná sa tseirbhís phoiblí i gcoitinne ná i gcomhlacht a mhaoinítear go hiomlán nó go páirteach le hairgead poiblí. Baineann an toirmeasc céanna ar athfhostú leis na scéimeanna iomarcaíochta ach amháin nach mairfidh an toirmeasc ach seacht mbliana, agus go mbeidh athfhostú ina dhiaidh sin faoi réir cheadú

an Aire Caiteachais Phoiblí agus Athchóirithe. Níl daoine a bhain leas as aon cheann den dá scéim sin cáilithe le cur isteach ar an gcomórtas seo.

Dearbhú

Iarrfar ar iarratasóirí dearbhú a thabhairt cé acu a bhain siad nó nár bhain siad leas roimhe seo as scéim luathscoir dreasaithe seirbhís phoiblí. Beidh ar iarratasóirí, leis, dearbhú a thabhairt maidir le haon teidlíocht atá acu ar phinsean Seirbhís Phoiblí (atá á híoc nó á chaomhnú) ó aon fhostaíocht Seirbhís Phoiblí eile agus/nó cé acu a fuair siad nó nach bhfuair siad íocaíocht in ionad i dtaca le haon seirbhís in aon fhostaíocht Seirbhís Phoiblí.

12. Rúndacht

Faoi réir fhorálacha an Achta um Shaoráil Faisnéise, 1997, déileálfar le hiarratais faoi rún daingean.

13. Freastal ar agallamh

Faoi na hiarratasóirí a bheidh sé a bheith ar fáil chun agallaimh agus pé socrúithe is gá a dhéanamh chun a chinntiú go bhfaighidh siad teachtaireachtaí a sheolfar chucu ag an seoladh r-phoist atá scríofa san iarratas. Ní bheidh COGG freagrach as costais arna dtabhú ag iarratasóirí.

16. Ceisteanna

Is féidir ceist ar bith mar gheall ar an bpróiseas nó ar an ról a sheoladh chuig poist@cogg.ie